

# VRS vršila etničko čišćenje u okolini Srebrenice

17 Jan 2012 Izmijenjeno 20:49 CET

Britanski oficir Pyers Tucker rekao je na suđenju Radovanu Karadžiću da je Vojska RS-a u martu 1993. provodila kampanju etničkog čišćenja nesrpskog stanovništva u okolini Srebrenice



Većinu civila svjedok je opisao kao žrtve etničkog čišćenja iz drugih krajeva, od kojih su neki morali bježati više puta [AFP]

Britanski oficir Pyers Tucker posvjedočio je u utorak na suđenju bivšem predsjedniku Republike Srpske (RS) i optuženom za genocid i ratne zločine Radovanu Karadžiću pred Haškim tribunalom (ICTY) da je Vojska RS-a (VRS) u martu 1993. godine provodila kampanju etničkog čišćenja nesrpskog stanovništva u okolini Srebrenice. Tucker, tadašnji vojni asistent Philippea Morillon, komandanta UNPROFOR-a u Bosni i Hercegovini, izjavio je da je VRS u to vrijeme poduzeo ofanzivu čiji je cilj bio da suzi enklavu i hiljade bošnjačkih izbjeglica sabije u sam grad. "Stekao sam utisak da su izbjeglice vjerovalle da se to može završiti samo njihovom smrću", izjavio je Tucker, koji je, s francuskim generalom Morillonom, bio u Srebrenici 11. i 12. marta 1993. godine, u pokušaju da zaustavi ofanzivu srpskih snaga.

'Stekao sam utisak da su izbjeglice vjerovalle da se to može završiti samo njihovom smrću', izjavio je Tucker.

Rekao je da su zatekli "užasnu situaciju", zbog koje je Morillon najavio da će Srebrenicu proglasiti "zaštićenom zonom" Ujedinjenih naroda (UN), što je kasnije učinilo Vijeće sigurnosti UN-a. Karadžić je optužen za genocid počinjen u Srebrenici i još sedam bosanskohercegovačkih općina te za progon Bošnjaka i Hrvata širom Bosne i Hercegovine, kao i za teror nad civilima u Sarajevu dugotrajnim granatiranjem i snajperiranjem te za uzimanje pripadnika mirovnih snaga UN-a za taoce u periodu između 1992. i 1995. godine.

## Progoni i zločini

Grad je, prema njegovom iskazu, bio prenapučen civilima, koji su u njemu potražili sigurnost. Većinu civila svjedok je opisao kao žrtve etničkog čišćenja iz drugih krajeva, od kojih su neki morali bježati više puta. VRS je, kako je objasnio svjedok, otvarao vatru ne samo na stanovništvo, nego i na UNPROFOR, koji je pokušavao dopremiti humanitarnu pomoć. Tucker je podvukao da su bosanski Srbi "namjerno i stalno opstruirali" prolazak humanitarnih konvoja do Srebrenice. On je kazao da je ofanziva na Srebrenicu bila u skladu s planom na mapi koji je početkom marta 1993. godine vidio u uredu Vinka Pandurevića, komandanta Zvorničke brigade VRS-a. ICTY je osudio Pandurevića na 13 godina zatvora zbog progona i drugih zločina nad Bošnjacima iz Srebrenice u julu 1995. godine. Situaciju na terenu, kako je Tucker rekao, tačno je opisao borbeni izvještaj jedinice VRS-a od 17. marta 1993. godine, koji mu je predao tužilac, a u kojem se navodi da je komandant "odlučio dijelom snaga pritisnuti enklavu kako bi se muslimani predali".

## Katastrofa pri evakuaciji

Bošnjačke snage u Srebrenici opisao je kao slabo naoružane "civile-izbjeglice, koji su bili napadnuti". "Nije bilo organizirane vojne jedinice, a imali su malo oružja i gotovo nimalo municije. Za jedan tenk nisu imali granate", kazao je svjedok. Tucker, koji je prisustvovao brojnim sastancima Morillona s Karadžićem i komandantom VRS-a, generalom Ratkom Mladićem, rekao je da je Mladić odobrio da 27. marta 1993. godine u Srebrenicu uđe 20 kamiona s hranom, kojim bi u povratku iz enklave bile evakuirane žene i djeca.

VRS u periodu od 1992. do 1993. godine terorizirao stanovništvo Sarajeva neprekidnim bombardiranjem, koje je moglo biti provedeno samo uz odobrenje visokih komandanata.

"Pri evakuaciji se, međutim, desila katastrofa, kada su neki od civila pregaženi zbog panike koja je izbila pri ukrcavanju u kamione", izjavio je svjedok. Mladić, koji je optužen za genocid i druge zločine počinjene u Bosni i Hercegovini, čeka početak suđenja pred Sudom u Hagu. Tucker je posvjedočio i da je VRS u periodu od 1992. do 1993. godine terorizirao stanovništvo Sarajeva neprekidnim bombardiranjem, koje je moglo biti provedeno samo uz odobrenje visokih komandanata.

Karadžić će Tuckera unakrsno ispitati u srijedu, javio je BIRN.

*Izvor: Al Jazeera*